

四庫全書

集部

欽定四庫全書

集部

元文類卷五至七

詳校官通政使_臣夢吉

助教_臣常循覆勘

總校官庶吉士_臣朱鈐

校對官中書_臣嵇承志

謄錄監生_臣劉文耀

欽定四庫全書

元文類卷五

元 蘇天爵 編

七言古詩

鄧州城樓

元好問

鄧州城下湍水流鄧州城隅多古丘
隆中布衣不復見浮雲西北空悠悠
長鯨駕空海波立老鶴叫月蒼烟愁
自古江山感遊子今人誰解賦登樓

吊故宮

杜瑛

月上觚稜椒壁濕飢烏啄碎琅玕石
劫灰飛盡海揚塵
廢殿荒臺土花碧洛陽書生汁梁客
一夜春風頭欲白
尊中賴有酒如泉醉倚寒窗破愁寂

巨源相過話舊有感

王磐

中統三年春二月變起青齊帶吳越
鯨鯢轉側海波翻
城郭橫尸野流血我時辛苦賊中來
兵塵糝糊眼不開
妻孥棄捐豺虎口飛蓬飄轉無根荻
天寒日暮齊河縣
破驛荒涼絕烟爨騎行驛馬鈍如蛙
官吏散地無處喚

與君此地忽相逢行臺郎中氣勢雄憫我白頭遭喪亂
壯我臨難全孤忠急呼驛吏具鞍馬使我厄路還亨通
明晨相隨濟南去出入條侯營壘中死生契濶不相棄
起居飲食常相同標山華注日在眼綿歷春草及秋風
四郊斫木桑柘盡灤源飲馬波濤空兗渠腰領膏野草
始見齊魯收烟烽巨源巨源君且坐我欲高歌君可和
往事回頭十五年猶想離魂招楚些身逢喪亂百憂纏
生不成名空老大我依破硯竊恩榮君佐雄藩收最課

流萍暫聚不多時且喜相看顏一破我衰無力訪君難
願君得暇頻相過

有懷梁仲經父

楊 真

美人熒熒在何處海濶天低隔烟霧珊瑚零落芙蓉空
咫尺相望迷去路翠輦金輿雙鳳凰風吹環佩聲琅琅
壺觴狼藉事已往一日萬里愁茫茫劉郎竟是誰家客
歲晚霜華林葉赤美人熒熒在何處鴨綠江頭江月白

金太子允恭墨竹

劉 因

黑龍江頭氣鬱葱武元射龍江水中江聲怒號久不瀉
破墨揮灑餘神功天人與竹皆真龍墨竹以來凡馬空
人間只有墨君堂何曾夢到瓊華宮瑤光樓前月如練
倒影自有河山雄金源大定始全盛時以漢文當世宗
興陵為父明昌子樂事孰與東宮同文采不隨焦土盡
風節直與幽蘭崇百年圖籍有蕭相一代英雄誰蔡公
策書紛紛少顏色空山夜哭遺山翁我亦飄零感白髮
哀歌對此吟雙蓬秋聲瀟瀟來晚風極目海角天無窮

黑龍江見金史幽蘭軒義宗死所汴亡張蔡公以金寶錄歸遺山嘗就公謄錄此軸亦公得于汴之中秘者公之子仲仁持以求子詩故終篇及之

金太子允恭唐人馬

劉因

道人神駿心所憐天人龍種畫亦然房星流光忽當眼
徑欲攬轡秋風前漢家金粟幾蒼烟江都筆勢猶翩翩
東丹獵騎自豪貴風氣惜有遼東偏天人秀發長白山
畫圖省識開元年金源馬坊全盛日四十萬匹如秦川
天教劫火留此幅玉花浮動青連錢英靈無復汗石馬

悲鳴真似泣金僊只今回首望甘泉汾州繁華鴈影邊
奇探竟隨轍跡盡兀坐宛在驂騑先人間若有穆天子
我詩當作祁招篇

陳氏莊

劉因

陳氏園林千戶封晴樓水閣圍春風翠華當年此駐蹕
太平天子長揚宮浮雲南去繁華歇回首梁園亦灰滅
淵明亂後獨歸來欲傳龍山想愁絕今我獨行尋故基
前日家僮白髮垂相看不用吞聲哭試賦宗周黍離離

陳氏先父之外家也金章宗每出獵必宿其家淵明謂先父龍山指孟嘉事

渡白溝

劉因

東北天高連海嶼太行蟠蟠如怒虎一聲霜鴈界河秋
感慨孤懷幾千古只知南北限長江誰割鴻溝來此處
三關南下望風雲萬里長風見高舉萊公灑落近雄才
顯德千年亦英主謀臣史臣強解事枉著渠頭汙吾鼓
十年鐵硯自庸奴五載兒皇安足數當時一失榆關路
便覺燕雲非我土更從晚唐望沙陀自此橫流穿一縷

誰知江北杜鵑來正見海東青鳥去漁陽搗鼓鳴地中
鷓鴣飛滿梁園樹黃雲白草西樓暮木葉山頭幾風雨
只應漠漠黃龍府比似愁岡更愁苦天教遺壘說向人
凍雨頑雲結淒楚古稱幽燕多義烈鳴咽泉聲瀉餘怒
仰天大笑東風來雲放殘陽指歸渡

宋徽宗賜周準人馬圖

劉因

筆底金鞍有肅爽誰云不博降王長汴梁門外若雲屯
畫本相看應自賞十載青衣夢故都經營慘淡欲何如

只除金粟呼風鳥曾見昭陵鐵馬趨

宋理宗書宮扇

劉因

杭州宮扇二好事者得之燕市一畫雪夜泛舟一畫二
色菊理宗題其背有興盡為期及晚節寒香之句諸公
賦詩予亦同作

天津月明啼杜鵑梁園春色凝寒烟傷心莫說靖康前
吳山又到繁華年繁華幾時春已換千秋萬古合歡扇
銅雀香消見墨痕秋去秋來幾恩怨一聲白鴈更西風

冠蓋散為烟霧空百錢鞵錦天留在禍胎要鑒驪山宮
當時夢裏金銀闕百子樓前無六月瓊枝秀發後庭春
珠簾晴捲天門雪棹歌一曲白雲秋不覺金人淚暗流
乾坤幾度青城月扇影無情也解愁五雲回首燕山北
燕山雪花大如席雪花漫漫冰戔戔大風起兮奈爾何

登荆軻山

劉因

兩山巉巉補天色中有萬斛江聲哀人言此地荆軻館
尚餘飛壘山之隈太子西來函關開誰信生鬼為禍胎

筆頭斷取江山去已覺全燕如死灰馬遷尚俠非史才
淵明憤世傷幽懷春秋盜例久不舉紫陽老筆生風雷
遺臺古樹空崔嵬平蕪落日寒烟堆紛紛此世亦良苦
今古燕秦經幾回憂來徑欲浮蓬萊安得魯連同一盃
碣石東頭喚美門六鰲載我三山來

幼安濯足圖

劉因

漢家無復雲臺功生平不識大耳公眼中天意鏡中語
此身只有扁舟東關東諸公亦英雄百年能辨山陽封

歸來老栢號秋風世路悠悠七十翁
乾坤故物兩足在
霜海浮雲空復空無刀可斷華太尉
有死不為丕太中
丹青白帽凜冰雪高山目送冥飛鴻
為問蘇家好兄弟

萬古北海誰真龍

長公愛文舉次公愛幼
安蓋氣質各以類云

歸去來圖

劉因

淵明豪氣昔未除翺翔八表凌天衢
歸來荒徑手自鋤
草中恐生劉寄奴中年欲與夷皓俱
晚節樂地歸唐虞
平生磊磊一物無停雲懷人早所圖
有酒今與龐通沽

眼中之人不可呼哀歌撫卷聲嗚嗚

淵明歸來圖

盧 摯

留侯晚歲游赤松武侯早歲稱卧龍亡秦扶漢聲隆隆
淵明初非避俗翁兩侯大節將無同陽秋特書晉甲子
辭鋒時露長沙雄王弘何幸逢吾足督郵能芥平生胃
門前五柳春濛濛落絮不與江波東環堵蕭然吾未窮
北牕儘有羲皇風畫圖不盡千古意詩成一笑浮雲空

淵明歸來圖

尚 野

羲皇上人鄉里兒田園將蕪非所思楚聲雖託絕怨懣
高情千古歸來辭歸來忽復河山移忠憤意切語益微
白雲遙遙望不極東籬舊菊西山薇夷齊奚疑怨耶非
况乃貌此遺世資文行圭璧照方冊飄然髣髴空同時
子雲擬聖諸儒譏法言美新吾誰欺考亭夫子春秋筆
昭然晉莽日星垂

過黃陵廟

李材

黃陵廟前湘水綠天寒漁郎唱巴曲沙棠舟上月蒼蒼

翠蛟白蜃江茫茫似聞清愁五十柱萬里鴻飛楓葉暮
神鴉翻舞祠門開珠裳玉袖霑莓苔玄猿晝啼蘿薜影
赤鱗夜去芙蓉冷北渚淚痕斑竹紋南風哀思蒼梧雲
山頭古桂秋露碧山下江流豈終極荒涼揭車雜杜蘅
靈風自吹煙霧旌輕帆晚向芳洲泊聊薦蘋羞奠蘭酌
沅有汜兮湘有沱洞庭木落生層波裴回獨詠騷人歌

金人出塞圖

虞集

海風吹沙如捲濤高為陲磧深為壕築壘其上嚴周遭

名王專居氣振豪肉食渾飲田為遨八月草白雲颼颼
馬食草實輕骨毛加弦試弓復置橐今日不樂心慄慄
什什伍伍呼其曹銀黃兔鵲明繡袍鷓鴣小管隨鳴鞞
背孤向虛出北臯海東之鷲王不驕錦鞬金鏃紅絨條
按習久蓄思一超是時晶清天翳絕駕鷲東來雲帖帖
去地萬仞天一瞥離婁屬望目力竭微如聞音鷲一掣
束身直上不回折遂使孤飛一片雪頃刻平蕪洒毛血
爭誇得雋頻足悅挂兔縣狼何足說旌旗先歸向城闕

落日悲風起蕭屑烟塵滿城鼓微咽大酋要王具甘歆
王亦欣然沃焦熱閑支出迎騎小驢琵琶兩姬紅顴頰
舞歌迭進醉燭滅穹廬斜轉穉穠月

董元夏景山口待渡圖

虞集

董元夏山何可得嘉木千章鐵作畫層巒總含雨氣潤
百谷正受川光溢犬牙洲渚善泝洄滄江散落碣石開
山田何處無耕鑿尋源不得還徘徊下行人將有適
臨流不度心為惻我揖孔堅舟孔安奉子以濟諒非難

送孟修兄南歸

虞集

老兄五月來作客八年不見頭總白五人兄弟四人在
每憶中郎淚霑臆我家蜀西忠孝門無田無宅惟書存
兄雖筦庫實父廕弟竊餘澤承君恩文章不如仲氏好
叔氏最小今亦老土郎十歲未知學嗟我胡為長遠道
諸兒讀書俱不多又不力耕知奈何憂來唯得二三友
看花把酒臨風歌蜀山嵯峨歸未得盤盤先隴臨川側
碧梧翠竹手自移應與青松各千尺南風吹雪河始冰

兄歸烏帽何叢叢明年乞身向天子共讀父書歌太平

寄鄉友

馬祖常

河邊父老念我出遠寄京華書一行謂言白髮今多少
又報南園竹樹荒門前石田秔秫熟犢子新生走如鹿
莫戀官家有俸錢長年作客身如束

送蘇公赴嶺北行省郎中

王如熙

居庸關頭亂山積李陵臺西白沙磧畫省郎官貂帽側
飛雪皚皚馬韉濕馬蹄雪深遲遲行冷月悽雲塞垣明

鐵甲無光烽不驚萬營角聲如水平
明年四月新草生
征人賣劍隴頭耕思君遙遙隔高城
南風城樓來鴈鳴

萬竹亭

范攄

誰能買山種萬竹殘年請老住巴蜀
結亭更在竹中間
四面雲谿寫山麓風敲最覺夜眠清
雨洗薦延秋望綠
日吟不限三千字日飲定須過百斛
隴西仙翁持斧客
散馬涼城行新菊為言令弟隱滄江
如此風流天下獨
乃家正在蠶茨野東東琅玕繞茅屋
方知白眼待時人

箕踞科頭自為俗是邦于雲劇博雅閉門草玄食漢祿
多緣未識此君心往事微瑕傷白玉使君自是廊廟具
方駕前修詎為辱平生抱負勁直節日暮天寒照空谷
始我瞻望望不及終我嘆嗟嗟不足乞官倘或從西遊
向子亭邊祝黃鵠

滋溪書堂

謝端

趙之川渚浸淶易恒滄泝浹各異出惟滋有溪亦是匹
或伏或見乃不容不能百里渚是從混混千里俱朝宗

子曩涉河觀湖江蹕雲蕩日怒擊撞歸視子滋嶺之瀧
是滋名揚子所始有田有廬水之渼有堂三楹庠非侈
中經子史堂右左高曾遺子以自課子迺善繼志不惰
蒐今撫古扶怪奇泓涵演迤吐為辭副墨往往傳京師
羸金青紫世所取滋溪有源子有後斯堂斯書可世守
雜言

觀雷溪

劉因

飛狐天下脊老氣盤互回三江瀉天怒合為一水東南

來此勢不殺令人愁石門喜見西山開未補青天裂誰
鑿渾沌胎奇聲猛狀萬萬古山根幾許猶崔嵬兩山倒
傾瀾百丈逢顛崖先聲動毛髮餘爽開襟懷初疑萬壑
轉奔石意象髣髴坤軸摧又疑鼓角鳴地中百步未到
仍徘徊荒祠下石磴駭目何雄哉春風不到太古雪今
日乃得胷中雷穿石誰能窮窟宅流沫勢欲浮蓬萊平
生芥蒂今寒灰兩耳到骨無纖埃酈元筆頭天下水石
頭之奇猶見推乃知茲游亦奇絕快弄素霓噴瓊瑰東

崖一片石坐拂千年苔為招郎山君共捲長鯨盃江妃
為過靈鼓催赤鯀躍出銀山堆先生醉來泉灑面狂歌
一和湍聲哀

游郎山

劉因

昨日山東州馬耳索御凌風嘶今日軍市中不覺已落
山之西山之面背一無異不待風烟變化神已迷危關
度雪嶺亂石通荒蹊林間小草不識風日自太古我行
終日仰羨木杪幽禽啼但見雨色來雲物颯以淒忽然

長嘯得石頂痛快如御駿馬蹄萬里來長風五色開晴
霓長劒倚天立皎潔瑩鵬鵠平地拔起不傾側物外想
有神物提詩家舊品嵩少同畫圖省見巫山低誰令九
華名獨與八桂齊千態萬狀天不知敢以兩目窮端倪
騫騰誰避若飛隼側瞰何屈如怒猊千年落窮邊烟草
寒萋萋若非酈亭書生此鄉國物色誰省曾分題

酈道元注

水經說酈山形勢最真今涿郡有酈亭其先世所居也

乾坤至寶會有待豈有江

山如此不着幽人棲頗聞山中人雲間時聞犬與鷄只

疑名山別有靈境在不許塵世窮攀躋不是先生南游
有成約徑欲共把白雲犁九疑窺衡湘禹穴探會稽玉
井爛賞金芙蓉日觀倒捲青玻璃風烟回首莫瀟灑南
游準擬相招携

岳陽樓

張經

巴陵形勝甲天下郡治西南有樓曰岳陽盡得巴陵之
勝至元丙戌余以監察御史按臨長沙道山巴陵凡一
往返不暇一登甲午夏備員湖北憲司分司于辰始得

以酬平昔之志噫湖山如此造物者何其靳邪因留數語以識歲月云

洞庭一水七百里烟朝月夕皆經過豈知斜陽萬里更有一佳處君山十二盤青螺乾坤有此樓萬古高嵯峨憶昨長江咫尺限南北風烟畫本一日千摩挲今朝快一登恍若驅沉疴生平所羨鑑湖請乃今更覺君恩多湘靈也似知我至時令白鳥來婆婆鐵笛紫荊曲春草黃陵歌江山一醉謾不省悲風落日生白波愛山愛水

亦非癖奈此日月如飛梭
彭蠡銀山堆碧海青銅磨
武昌雲間嘆黃鶴采石天外愁
青娥詩家割據幾今古元
氣發泄天不訶扁舟歸來月一
蓂仙槎已候三山阿吾
欲乘興觀銀河

題丁氏松澗圖

鄧文原

天目之峯凌紫烟下周林壑紆長川
清池斗絕涵倒景
神運直自疏鑿先彼美幽貞廬間房
曲奧辛夷荃蒼官
手植經幾年靈虯天矯今參天
門前朝流暮流水但聞

激石瀉瀨鳴濺濺山人養真衡茅下有書可讀琴可弦
意行清澗曲長嘯松風前山月出林高溪花弄春妍仙
人欲來夜將半天空鶴唳山淒然飈塵大笑狂馳子口
誦丹訣傳真玄我欲從之結鄰屋得疏藥圃謀芝田

我本山人素志丘壑獲歸名山為願畢矣爰以四
月十一日離京師是夜抵潞陽慨然賦詩遙慰
匡廬隱者併以寄金門諸公為一喙云

李 沔

野馬脫羈勒，倏疑天地寬。臨風一長鳴，風吹散入青冥間。
頗如魯仲連，蹈海不復還。又如安期生，長留一鳥令。
人看江南浩蕩忽，如海落日照耀浮雲關。既不能低眉，
伏氣摧心，顏詭遇特達，驚冥頑，又不能抱書挾策千萬。
乘調笑，日月相迴盤，匡廬迢迢接仙山。仙翁泛若秋雲，
閑長松之陰，引孤鶴望我不見空長嘆。采鉛天池，飲
淥桃花灣。蒼梧倒影三湘寒，赤城霞氣生微瀾。鯨鯢翻
空海波赤，曉色欲上扶桑難。人間之樂兮，誠不足恃何。

雲露芝田腴我亦人間山澤臞偶陪時龍賓唐虞有時
一醉黃公壚震風三日撼不蘇折華不得度弱水揮手
始識仙凡殊玉堂學士危與吳遺我茲山之畫圖尋牕
數戶久歎息無因置我雙檇蒲獨行幽人不受呼掃葉
青澗聽啼鳥日暮蘿徑相縈紆相縈紆向何處明朝為
借麻姑鵬我亦騎之上天去

雜體

入安南絕不作詩清明感事

集句

陳孚

十里宜春下苑花五年寒食住京華
自憐慣識金蓮燭奉使虛隨八月槎

回首扶桑銅柱標芙蓉帳暖度春宵
清明寒食誰家哭折戟沉沙鐵未消

水流花謝兩無情獨上高樓望帝京
閑憶金明池上路人生看得幾清明

江東行客思悠哉不盡長江滾滾來
寒食清明都過了鷓鴣飛上越王臺

台州城濶海冥冥人踏金鰲背上行獨在異鄉為異客
無花無酒過清明

慈母年高鶴髮垂鄉書無鴈到家遲初過寒食一百六
一日思親十二時

共藉梨花作寒食孟光舉案與眉齊越裳翡翠無消息
夜合花前日又西

寒食家家出古城滿川風雨看潮生八千里外飄零客
起向朱櫻樹下行

一百五日寒食雨風光別我苦吟聲尚書氣與秋天杳
同是天涯流落人

海客乘槎上紫氛清明時節雨紛紛虎牙銅柱皆傾倒
水盡天南不見雲

遠遊聯句

壬寅冬與伯長同留
姑蘇時伯長將赴都

袁 袁

海鵬跨南雲一去扶浩蕩宛駒踏北雪絕足追罔象摘

宵征車載脂明發燈在幌行邁念悄悄離愁懷養養袁

違吳始按浙過越猶指掌虹網結長思羯鼓促新響觴

至不復辭

拘

駕逸誰能彷彿明堂企棟梁武庫須篠簜材

同瑚璉英

哀

學媿蓬麻長大施朱弦清小薦金莖沆雲

間鶴孤唳

拘

天外鴻橫上曉舫斫輕冰午店憇平壤追

攀瞰烟濤

哀

涉歷走塵鞅清淮橋螭螭薄霧裏驕驥風

臺牛一鳴

拘

日觀雞三唱團桑沃如蓋宿草亂若經青

帘客沽酒

哀

素鬣漁收網心觀洙泗流眼豁恒岱興追

程騎侵雲

拘

勸耕農植杖俗厚喜豐登氣俠存慨慷伊

河既東流

哀

維斗復北仰誰云風土殊始覺宇宙廣骨

聳終超騰神清誰懽悅鈞天夢豈真拘廣寒步空想銖

衣入閭闔芥粒視北垞千官紫府榮九奏彤庭暢摛文

剪金炬哀展窠簇天仗清都踰咫尺弱水謾方丈絳旗

雲霧開寶扇日月晃仁聲被八表拘德意昭羣枉況檢極

封崇芬飮嚴肸蠁瑞氣藹重重泰階瞻兩兩駟峯出天

厨哀裊蹠錫中帑鳴珂接俊彥正笏遠偏黨德人笑采

芝逋客棄拾橡茅拔要有方拘矢來本無響湘纍但環

詞越相僅金像遭讒氣徒憤得計身何往豈如及承平

相與窮昭朗君行迹飄飄我滯心悵快輕霜著裘帽

東

微雪留草莽離歌出蒹葭古製却益益先登匪一獲後

至激孤獎城南燈火深

摘

塞北音書睽春風漸披拂臘

水將滉漾詩成愈加險酒盡未為彊雙眸秋水炯

東累

語春波盪經行度崎危交友希倜儻羈遊棄楚荒遠客

憐齊傖光陰尺璧重

摘

事業千金賞行還鴈塔題復覩

鴻都榜時來戒步窘事至勿技癢脂韋本凡近

東

鐵石

乃忠謹詞林納疵美書田計荒穰列仙會儒癯

摘

羣公

極吏駟陸生強咿嘸陶令終翫骸清心百壬避正色上
帝饗徒為捧心施莫學畫眉敞功名要無心造物端有
相行行遂初志操持記疇曩

元文類卷五

欽定四庫全書

元文類卷六

元 蘇天爵 編

五言律詩

春思

張澄

一春常作客連日苦多風
野樹淒迷綠簷花暗澹紅
愁隨詩卷積囊與酒搏空
巢燕如相識頻來草舍中

觀物

許衡

萬物備吾身身貧道未貧
觀時見物理主敬得天真心

爽星辰夜情忻草木春自憐斲喪後能作太平人

趙氏南莊

許衡

曉起北窗涼清談戢羽觴入簾花氣重落地燕泥香夢裏青山好吟邊白日長秋風載書籍相對築茅堂

晚上易臺

劉因

遺臺連廢壘落日展遙岑海嶺天東北燕遼世古今每當多感慨直欲罷登臨莫更留塵跡千年不易禁

登武陽

劉因

朝遊樊子館晚上武陽城潮接滄溟近山從碣石生斷
虹雲淡白返照雨疎明且莫悲吟發樵歌已愴情

雜詩

劉因

堯山唐故國淳朴帶遺蹤種果收奴力開田享素封採
收多上藥景仰近神峯夢寐驅黃犢巖居二老農

其二

聞昔蜚狐口奇兵入擣虛人才九州外天道百年餘草
木皆成騎衣冠盡化魚遺民心膽破諱說戰爭初

其三

冀北高寒境英靈海岳全斯文若程邵家世亦幽燕祀
典今誰舉遺經會有傳吾鄉此盛事瞻仰在他年

其四

關嶺通山後風謠采路旁地寒人好壽草淺畜宜羊用
水如奴婢從川貯米糧西風如有約乘興即吾鄉

其五

何事招提好山深馬可驅松巢低暎帽竹溜細通厨霜

栗千封戶雲屏四畫圖冠巾如用我白鹿是規模

其六

巖居訪高道少日在風塵回首話前事低眉厭此身江
山資寇盜田畝化荆榛領取天倫重無君愁殺人

其七

水繞千山合雲藏數畝荒初尋香有陣漸入翠成行豚
甯依危石牛蹊帶小塘團茅庵如畫可惜是逃亡

過奉先

劉因

閏遼承宋統此志亦雄哉置縣名猶在因山勢已推百年元魏史千古汝南哀華表鶴應有悲風海上來

齋居雜言

何榮祖

名教無窮樂真知在暮年中庸萬事畢太極一心全世事頻觀易人情靜看天興來時有句率爾亦飄然

寄暢純父治中

姚燧

欲聞真息耗無使梓潼來烽火平時報田疇亂後開徒歌王粲賦不直士元才遙憶牛頭寺思親日幾迴

輿病高崖道中作

姚燧

役役乾坤遠，栖栖道路頻。
五年三入蜀，十夢九歸秦。
瘡鬼偏凌客，山英定笑人。
無勞問前渡，祇覺白頭新。

舟達黃溪

姚燧

草木隨寒暑，殊方榮悴同。
葦華兼露白，桰葉未霜紅。
日月雙飛鳥，江湖一病翁。
晚來沙嶼上，愁坐獨書空。

發舟青神縣

姚燧

青神開百丈，江岸轉荒涼。
薜荔緣松起，蒹葭並竹長。
深

披豺虎徑毒犯虺蛇鄉何莫非王事牽夫可惋傷

感事

姚燧

致位丞疑地夔龍伯仲間星當朝北斗日已薄西山取
謗因讐惡貪權失巧閑此行雖鐵甲未足比慙顏

次韻書事

安熙

野性元孤潔無朋儘自皤業荒聞道淺靜久閱人多靈
鳳寧棲枳冥鴻本避羅南遊有高興何處是滄波

病中齋居雜詩

安熙

多病交游少相看動浹辰賦詩聊遣興觀化足怡神問
字有知己過門無俗人伊誰同此樂願卜許東鄰

進詩一首

李孟

十年陪顧問一旦決安危自合成功去應慚見事遲長
城何自壞孤注莫相疑辟穀求仙者高明百世師

岳陽樓待渡

高思恭

楚水凝千里湘雲隔萬層城高秋浦月星雜夜船燈旅
況天誰管年光鴈可憑殷勤澹山色相送過巴陵

泊舟湘岸

李材

長沙今在眼青草舊知名二月風檣疾三湘雪浪平
藤深帝子廟花發定王城莫艤江南岸啼鵲處處聲

遊山寺

李材

行行行復止行到白雲間見客意不俗逢僧心便閑
細泉分別澗小逕入他山擬借禪房榻追遊信宿還

送蘇子寧赴嶺北行省郎中

袁桷

貂帽護寒沙冰天閱歲華斷溪駝聽水密雪犬行車雲

盡難尋鴈春深未識花昔人奇絕處八月解乘槎

又

往歲經游地寒蕪碧燐深雲開山後陣水咽隴頭吟雪
白羶房重天青羽檄沈重華新雨露悲喜候車音

名酒

虞集

名酒不可得幽華誰送來秋霜垂鬢髮夕照在樓臺盡
日山公醉何年度信迴喚人吹玉笛移席坐蒼苔

題秋山圖

虞集

峯迴留深隱天清襲素袍棲身斷人蹟游目送鴻毛樹
挂栖厓驚藤懸飲子孫龍眠石澗冷虎撼樹根牢木客
吟時共山樵奕處遭浮雲過水盡孤月挾霜高羽使來
三島胎仙舞九臯左招玉斧飲右攬赤松遨空色收寥
廓虛聲起繹騷彈琴遺古散載酒棹輕舸遂向圖中見
誰能世外逃乘槎幾月至一泛九秋濤

送國王朶而只之遼東

虞集

太祖收中夏元臣有武功建邦開土宇為位冠君公奕

世王章在諸孫相業隆春秋周正月禮樂魯新宮鹿幣
金遺耐熊侯算失中河山仍鐵券寶玉若琬弓投筆鄒
枚秀揚旂芮綰雄寒雲依碣石凍雨灑遼東戎器橐藏
盡賢書奏納同大夫勞誓御惇史采民風

朝迴即事

虞集

宮樹春陰合霓旌拂曙來天光臨閣道雲氣轉蓬萊晝
漏沈沈鼓晨尊灑灑盃香霏簾底霧樂隱殿前雷祥瑞
儀曹奏珍淳尚食催舞廷分鷺序效獻過龍媒融雪微

生草輕風不動埃老人南極至王母上方迴玉色何多
喜金華得重陪裁詩賀朝雨西閣待門開

石田山居

馬祖常

甲子人愁雨河田麥已丹歲凶捐瘠衆天遠禱祠難賈
客還沽酒王孫自飽餐更憐鰥面黑征戍出桑乾

其二

積雨衣裳濕愁人是麥田泥將深沒馬霧欲墮飛鳶襲
火勞薪盡家居老屋穿牆根雜蛙蚓擬買繫籬船

其三

光山楓製錦潢浦荻飛綿秫熟何論酒魚來不計錢卜
鄰多野老求藥有神仙為客留羹荀清晨步石田

其四

四月淮天雨清林蔭碧池荀香鄰瓮酒禽響客牕碁田
鼓春迎社鄉巫夜賽祠漸知飄泊久自覺是農師

其五

無麥夫何極吾憂隴畝空豈能驅盜賊得恐鬻兒童茶

蓼充腸熟樵蘇救口窮無端縣小吏召役到疲癯

其六

作客何多意淮南即是家自牽蘿屋小不正葛巾斜書
嬾眠尤熟詩來酒更賒春天雲嫵媚相對坐鷗沙

其七

竟日無賓主山房一禿翁竹光浮畫碧花藥颺春紅田
父分雞桀鄰僧與鶴籠時行親杖屨未覺坐書空

其八

淮南窮僻地先世有林廬花曙鳴山鳥芹春躍岸魚鼓
琴仙度曲鍊杏客傳書朋舊如相覓休嗔禮法疎

郎中蘇公哀挽

馬祖常

墓門翁仲泣秋草九原深身世書盈屋鄉園樹滿林故
人多執紼令子蚤冠簪曾作陽關曲今成薤露吟

癸酉除夕

劉汶

此夕何多感明朝過六旬乾坤又元統人物少咸淳酒
厭山杯淥梅傷水國春燈前曾戲綵馬首一沾巾

早春述懷

劉汝

春與年年別窮隨日日增眼明貪夜讀事少忘晨興倦
鳥猶遷木潛魚已陟冰栖遲唯故轍無夢到飛騰

七言律詩

杏花落後分韻得歸字

元好問

獼髓能醫病頰肥鸞膠無那片紅飛殘陽淡淡不肯下
流水溶溶何處歸煮酒青林寒食過明粧高燭賞心違
寫生正有徐熙在漢苑招魂果是非

長安感懷

楊 奐

此心正欲作東周再到長安已白頭往事無憑空擊楫
故人何處獨登樓月搖銀海秦陵夜露滴金莖漢殿秋
落日酒醒雙淚眼幾時清渭向西流

洛陽懷古

楊 果

洛陽雲樹鬱崔嵬落日行人首重回山勢忽從平野斷
河聲偏到故宮哀五噫擬逐梁鴻去六印休驚季子來
惆悵青槐舊時路年年無數野棠開

南京遇仙樓

劉祁

倚天突兀聳高樓樓上家人白玉鉤
落日笙歌迷汴水春風燈火似揚州
仙人已去名空在豪客同來醉未休
獨倚朱闌望明月鸞旌依約認重游

戊辰冬赴試西京

王革

慣掣蒼龍曉漏鐘受恩曾入大明宮
香浮扇影迎初日人逐鞭聲靜曉風
轉首俄驚成異世此身雖在已衰翁
喚回五十年前夢再著麻衣待至公

題劉京叔歸潛堂

薛玄

獨構茅堂養道真，滿前俗事罷紛紜。
磻溪夜釣波心月，汾曲春耕隴上雲。
長笑熊羆勞應夢，肯教猿鶴怨移文。
近來傳得安心法，萬壑松風枕上聞。

秋思

杜瑛

壯心忽忽劇懸旌，秋氣能令客子驚。
白鴈不聞雲外過，清霜先向鬢邊生。
銅駝巷陌周東土，金鳳樓臺鄴北城。
千古繁華俱一夢，空餘草木戰風聲。

和家弟誠之詩韻

段克己

欲歸誰不遣君歸却恨歸來事事違
烽火未休家信少山川良是故人稀
黃金入手還能散白雪盈頭不肯飛
試問春愁都幾許長江滾滾日暉暉

雨後漫成

段成己

羈思紛紛不易裁晚涼扶病獨登臺
翩翩幽鳥避人去殷殷輕雷送雨來
已拚此身閑裏老且將笑口酒邊開
安車待聘非吾事休作姑山隱逸猜

七月望日思親

許衡

思却千思與萬思音容無復見當時草牕夜靜燈前語
蔬圃春深膝下嬉將為百年供色養豈期一日變生離
太山為礪終磨盡此恨綿綿未易哀

燕城書事

魏璠

山勢回環西北高強燕自古出英豪地連雲朔偏宜馬
人襲衣冠盡帶刀塵暗玉樓無鳳宿雲埋金水似龍韜
可憐一片繁華地空見春風長綠蒿

送魯齋先生南歸

張易

袞袞諸公入省闈先生承詔獨南歸
道逢時否貧何病老得身閑古亦稀
行色一杯燕市酒春風三月故山薇
到家已及蠶生日布穀催耕隴麥肥

聞家大參南歸

林景熙

濱死孤臣雪滿顛冰蘊齧盡偶生全
衣冠萬里風塵老名節千年日月懸
清唳秋荒遼海鶴古魂春冷蜀山鵲
歸來親舊驚相問禾黍離離夕照邊

挽文丞相

徐世隆

大元不殺文丞相君義臣忠兩得之義似漢皇封齒日
忠於蜀將斫頭時乾坤日月華夷見海嶺風霜草木知
只恐史官編不盡老夫和淚寫新詩

次范藹莊韻

宋 衛

家近西湖六月涼蘭舟桂醕芰荷裳海門潮上波濤壯
天竺風來草木黃今日悲秋哦楚些他年著論辯吳亡
君才位置聞人說宜待詩仙七寶牀

過鄉縣西方古故居

劉因

古金大定間人嘗舉進士不第遂歸獨居一室置琴書其側不妄與人交縣令佐公服候門亦以遜辭謝遣之有田數十畝食其所獲如菽熟惟食菽鄉人好事者欲以米易之不聽曰是天所食者不可易也監察御史按行郡邑按其行上之不報其為人蓋亦近於聖學之所謂狷史家之所謂獨行者歟先父每舉以律鄉人之貪鄙者故鄉人至今能道之古死無後其丘壠已為樵牧

區今過其居亦莽焉荆棘中矣不覺感歎夫發潛德而紀先賢實後生之責也顧力未能焉姑題詩以紀先父之訓云

名姓初聞自過庭山田力食老窮經鄉閭月旦歸公論
耆宿風流尚典刑感事重吟鳬繹集懷賢誰築聘君亭
還家游子悲千種念舊思親淚自零

晚眺

劉因

巖姿濃淡似吾詩雲點青山學鬢絲老樹遺臺秋最早

斜陽流水鳥偏遲無人能解此時意如我曾來前古誰
本為登臨解陶寫豈知搖落更堪悲

易臺

劉因

望中孤鳥入消沈雲帶離愁結暮陰萬國河山有燕趙
百年風氣尚遼金物華暗與秋光老杯酒不隨人意深
無限霜松動巖壑天教搖落助清吟

望易京

劉因

亂山西下鬱岩堯還我燕南避世謠天作高秋何索寞

雲生故壘自飄蕭誰教神器歸羣盜只見金人泣本朝
莫恠風雷有餘怒田疇英烈未全消

海南鳥

劉因

越鳥羣飛朔漠濱氣機千古見真純乾干風景今如此
故國園林亦暮春精衛有情銜太華杜鵑無血到天津
聲聲解墮金銅淚未信吳兒是木人

朝回再次楊司業韻

吳澂

風吹仙樂下瑤臺閭闔中間翠輦來雲擁紅光千丈遠

日行黃道九天開百官星拱環金闕萬壽聲迴進玉盃
共覩太平新氣象四方犴獄長春苔

代祀南嶽登祝融峯

趙世延

天風吹我躡雲根一覽羣山蟻垤紛瀛海波翻初日上
石壇人語半空聞炎荒作鎮荆吳遠元氣流形天地分
何日東書煨芋室孤峯絕頂看浮雲

駕畋柳林隨侍

陳益稷

仙仗平明擁翠華景陽鐘發海東霞千官捧日臨春殿

萬騎屯雲動曉沙
白鷁韞翻山霧薄
黃龍旗拂柳風斜
太平氣象民同樂
南北梯航共一家

題許仲仁詩卷

程鉅夫

殘雪詞林退食時
小牕開卷鬢如絲
音傳正始誰同調
氣逼元和稍自持
文字不隨前輩盡
風流却許後人知
霜清日冷梅花瘦
獨對爐熏看欲癡

岳陽樓

梁曾

樓前秋水健帆開
樓上涼風舞袖迴
萬里舟航通鳥道

四時雲雨護龍堆江山如此不一醉歲月幾何能再來
欲問老髯求鐵笛月中吹上紫荆臺

題麻姑壇

郝天挺

路入雲關仙境佳瓊田瑤草帶烟霞貯經洞古無遺檢
養藥爐存失舊砂青鳥不傳金母信紫鸞應返玉皇家
巖扉不掩春長在開盡碧桃千樹花

都門春日

李材

綺陌香塵逐玉珂彤樓花暗弄雲和光風已轉瀛洲草

細雨微生太液波
月榭管絃鳴曙早
水亭簾幕受寒多
少年易感傷春意
喚取青娥對酒歌

禁城秋夕

李材

絳宮星淡海無波
九陌猶聞動玉珂
閭闔微雲藏夕漏
建章明月挂秋河
此身天地流萍遠
故國關山落木多
欲聽鈞天塵夢隔
紫簫吹盡挂婆娑

元日賀裴都事朝迴

李材

海上瓊樓接五城
人間歌吹近蓬瀛
雲移豹尾旂旌動

日射螭頭劔佩明
拜舞盡隨仙仗入
退歸遙認玉珂鳴
欣欣百草含春意
得傍東君暖處生

壽杜侍御

李材

黃閣老臣踵夔咎
法冠蒼佩陪霓旄
八龍委蛇捲春雨
一鶚搏控明秋毫
華勲玉冊耀天府
雄章銀筆翻雲濤
舉觴獻壽碧桃晚
南極正與文星高

和王御史春詩韻

李材

鶯啼燕語花漸稀
天明海碧涵晴暉
洛陽臺榭春色在

山陰衣冠昔人非夢雲何處讌瑤席舞雪誰家裁紵衣
獨有倚闌無限思迢迢煙草暮鴻飛

送省郎楊耀卿使雲南

李材

飄飄使節出金閨郭隗臺前暫解携天入五溪無鴈到
地經三峽有猿啼子雲舊里風煙在太尉家聲日月齊
後夜客槎何處望秋河迢遞碧雲低

席上賦老松怪栢圖

李材

仙人解衣盤薄羸造化慘澹秋毫端枝柯千仞入層漢

笙簫萬壑鳴驚湍堂中日月不可老壁上雷雨何時乾
我來醉卧北窻下夢跨黃鵠天風寒

次韻荅友見贈

安熙

高山流水趣何深萬古千秋一素琴白石清泉成雅志
光風霽月負初心伏龍應羨雲生谷獨鶴不驚雅滿林
無用堊夫宜揣分商家元自有甘霖

留別都城諸公

李京

蒼龍雙闕鬱岩堯曾侍鴈鸞赴早朝往事已隨塵滾滾

虛名贏得鬢蕭蕭
長林豐草空相憶
瘴雨蠻烟苦見招
借問都門門外柳
為誰留著最長條

元文類卷六

欽定四庫全書

元文類卷七

元 蘇天爵 編

七言律詩

聞擣衣

趙孟頫

露下碧梧秋滿天
砧聲不斷思綿綿
北來風俗猶存古
南渡衣冠不及前
苜蓿總肥宛驤褭
枇杷曾泣漢嬋娟
人間俯仰成今昔
何待他年始惘然

溪上

趙孟頫

溪上東風吹柳花
溪頭春水淨無沙
白鷗自信無機事
玄鳥猶知有歲華
錦纜牙樯非昨夢
鳳笙龍管是誰家
令人苦憶東陵子
擬問園田學種瓜

道場山

趙孟頫

絕頂清江凌翠烟
登臨應費酒如川
平生能著幾兩屐
負郭何須二頃田
初日出雲光射地
雙溪入湖波接天
升高望遠我所愛
青壁有路何當緣

蛾眉亭

趙孟頫

天門日湧大江來，牛渚風生萬壑哀。
青眼故人携酒共，兩眉今日為君開。
蒼崖直下蛟龍吼，白浪橫空鵝鷺迴。
南望青山懷李白，沙頭官渡苦相催。

多景樓

趙孟頫

層巔官閣幾時修，繞檻長江萬古流。
白露已零秋草綠，斜陽雖好暮雲稠。
平南籌策張華得，治內人才葛亮優。
景物未窮登覽興，角聲孤起瓮城秋。

雨華臺

因至故人
劉叔亮墓

趙孟頫

雨華臺上看晴空萬里風煙入望中人物車書南北混
江山襟帶古今同昆蟲未蟄霜先賈鳳鳥不鳴江自東
綠髮劉伶緣醉死往尋荒冢酹西風

過岳王墓

趙孟頫

鄂王墳上草離離秋色荒涼石獸危南渡君臣輕社稷
中原父老望旌旗英雄已死何嗟及天下中分遂不支
莫向西湖歌此曲水光山色不勝悲

錢塘懷古

趙孟頫

東南都會帝王州三月鶯花非舊游故國金人泣辭漢
當年玉馬去朝周湖山靡靡今猶在江水悠悠只自流
千古興亡盡如此春風麥秀使人愁

海子即事

趙孟頫

白水青林引興多紅裙翠黛奈愁何底從暮醉兼朝醉
聊復長歌更短歌輕燕受風迎落絮老魚吹浪動新荷
餘杭溪上扁舟好何日歸休理釣蓑

弁山佑聖宮次孟君復韻

趙孟頫

意行騎馬到林間晴霧都沈遠近山瓊樹著花春自早
翠禽雙語意相關一杯到手先成醉萬事無心觸處閑
猶欠抱琴來託宿靜中規寫水潺潺

城南山堂

趙孟頫

手種青松一萬栽草堂留在翠屏隈推窗綠樹排簷入
臨水紅桃對鏡開春雉雖迎朝日出暝禽啼傍夕陽來
山妻也有幽棲意數日遲留不肯迴

春日言懷

趙孟頫

點點飛花欲送春
萋萋芳草政愁人
黃蜂釀蜜經營急
紫燕銜泥來去頻
才似茂陵非晚遇
美如曲逆不長貧
久知求富都無益
但喜論詩若有神

紀舊游

趙孟頫

二月江南鶯亂飛
雜花開樹柳依依
落紅無數迷歌扇
嫩綠多情妬舞衣
金鴨焚香川上暝
畫船撸鼓月中歸
如今寂寞東風裏
把酒無言對夕暉

東陽八景樓

趙孟頫

山城秋色靜朝暉極目登臨未擬歸羽士曾聞遼鶴語
征人又見塞鴻飛西流二水玻璃合南去千峰紫翠圍
如此山川良不惡休文何事不勝衣

贈周景遠田師孟

趙孟頫

與子同客帝王州一日不見如三秋風高氣肅鴈聲急
天晴日暖蛛絲游籬下黃花為誰好水邊紅樹令人愁
世間萬事可撥遣日日痛飲醉即休

金陵懷古

趙孟頫

銅雀春深漢苑空
邯鄲月冷照秦宮
煙花樓閣西風裏
錦繡湖山落照中
河水南來非禹迹
冀方北去有唐風
溪城秋色催遲暮
愁對黃雲沒斷鴻

和周待制朝迴詩韻

袁 桷

雉尾高張擁玉皇
彤庭金榜燦明光
舞階飛絮呈滕六
執戟傳臚轉阿香
珠帽簫聲雙窈窕
翠旌雲影互方洋
侍臣誰近前階立
願紀堯年化日長

蛾眉班肅整皇皇
匝匝松陰漏午光
舞翻當軒催進酒

表函登陞促傳香六龍捧御雲中日三象輸琛嶺外洋
欲識兩宮清淨理薰風殿角漏初長

無題次伯庸韻

袁桷

金縷歌殘月滿江玉顏曾憶侍油幢象床雲重恩專一
鯨錦波翻賜疊雙春淺政宜羶作幕夜涼深恨魴為憲
浣紗可是無虛匹側足寒溪濺石淙

翠簾匝匝護朱光千葉宮桃滿院香閨苑有鸞通尺素
虛橋無鵲寄流黃上林賦罷歸巴蜀興慶詞工謫夜郎

不是月中親度曲世人那解聽霓裳

相期來似石城潮日望晴虹結綵橋却月眉愁歌漸遠
淩波步近意非遙抽琴有恨迴清角疊袖無塵轉綠腰
弄玉最憐隨鳳去秋來誰與伴吹簫

白髮詞臣兩耳垂華腴堆笏陋牛豎宮娥引燭催麻日
院吏傳更寫制時蠟撚化生秋夕賜翠標疊勝歲華移
低頭欲說唐朝舊願侍虛皇進玉卮

奉題延祐宸翰

鄧文原

欽惟仁宗上承祖武蒐羅俊彥求治靡寧尤尊禮儒臣
務敦風化由是治書侍御史臣郭貫擢禮部尚書凡在
選者六人惟貫進秩有加親灑宸翰昭示龍光忝備臣
僚咸增鼓舞集賢直學士臣鄧文原謹拜手稽首而作
詩曰

宵旰需賢表薦紳秩宗首選贊華勛官聯天府璇璣象
帝闡河圖琬琰文曾聽簫韶瞻曉日仰攀弓劍泣秋雲
小臣作頌稱仁聖湛露承恩未足云

題小薛王畫鹿

鄧文原

禮樂河間雅好儒，曾陪校獵奉鑾輿。
晝長靈囿觀遊後，政暇嘉賓燕集餘。
蛺蝶圖工人去久，騶虞詩好化行初。
宗藩翰墨留珍賞，憑仗相如賦子虛。

陪高彥敬游南山

鄧文原

不到南山又二年，離離秋草映寒泉。
東林蕭散開蓮社，西晉風流掉酒船。
古寺雲烟終日合，長松風雨半空懸。
謝公未了登臨興，故向禪房借榻眠。

郎中蘇公哀輓

志道

鄧文原

塞垣重鎮雪雲堆
畫諾人稱幙府才
流馬道艱逢歲儉
涸魚民困得春回
陽關猶記歌三疊
杜老俄成賦八哀
夜靜燕臺山月冷
祇疑化鶴一歸來

司業李公哀輓

元禮

貢奎

山立庭紳縱衆觀
名高真不愧儒冠
文章清廟藏琛玉
勲業烏堂鎮羽翰
譽重朝端知有子
貧憐身後似無官
百年耆舊彫零盡
展卷哀辭忍淚看

王內翰哀輓

惲

張養浩

束髮耽經晚益勤平生精力盡斯文先朝十老今餘幾
當代三王獨數君李賀屢煩韓愈駕羊曇空阻謝安墳
玉堂寥索人何在落日淇川滿白雲

送袁待制扈從上京

虞集

日色蒼涼映赭袍時巡無乃聖躬勞天連閣道晨留輦
星散周廬夜屬橐白馬錦韉來窈窕紫駝銀甕出蒲萄
從官車騎多如雨獨有揚雄賦最高

朝迴和周待制韻

虞集

三十六竿吹鳳皇九重春色絢天光
輕雲微動旌旗暖
湛露初晞草木香
貝葉神師東度嶺
金輿馴象北浮洋
小臣職在歌功德
拜手陳詩對日長

送朱生南歸

虞集

喜子南歸盱水上經過為我問臨川
幾家橘柚霜垂屋
何處蒹葭月滿船
應有交游憐遠道
試從父老說豐年
寒機早晚成春服
一一平安報日邊

題南野亭

虞集

門外烟塵接帝局，坐中春色自幽亭。
雲橫北極知天近，日轉東華覺地靈。
前澗魚游留客釣，上林鶯囀把杯聽。
莫誇韋曲花無數，獨擅終南雨後青。

歸蜀

虞集

我到成都住五日，駟馬橋下春水生。
過江相送荷主意，還鄉不留非我情。
鷓鴣輕筏下溪足，鸚鵡小窻呼客名。
賴得郾筒酒易醉，夜深衝雨漢州城。

自仁壽迴成都

虞集

還鄉思速去鄉遲王事相縻敢後期里父留看題壁字
山僧打送捨田碑胡桃筇竹南方要盧橘杞杷上國知
此日君親俱在望徘徊三顧欲何之

謝周南翁

虞集

使過池陽聞上日好懷浩蕩為君開江干維揖車馬集
亭上持盃風雨來通夜魚龍聽語竟明年鶯鶯憶朝迴
九華秋色翠可食為問謫仙安在哉

送李通甫赴湖南行省都事

虞集

黃鶴樓前江水春，江花飛接渡江人。
日長青瑣文書簡，雨過滄洲杜若新。
應共庾公揮扇坐，每尋崔顥賦詩頻。
三公舊掾多為相，行見迴車載繡茵。

御溝詩次宋顯夫韻

虞集

御溝雪融三月初，鳬鷺鴻鴈總來居。
蒲桃水綠可為酒，楊柳條青堪貫魚。
逶迤天河起箕尾，滉漾雲海浮青徐。
舟前花落傍飛燕，隄上風來濕舞裾。
翠輦時留金駟褭，

錦波不著玉芙蓉渠臨流宋玉偏能賦莫待東都客問予

試院書事

馬祖常

棘圍粉署隔重牆校藝分官屬正郎五夜風簾燒蠟燭
九天冰樹劑龍香周旋接武尚書履供帳留茵御史床
臚唱閤門春色曙侍臣應奏慶雲章

題光山縣孔宰幽風亭

馬祖常

光山近在故山西樹滿岡頭稻滿畦鄰屋讀書相教授
社祠醉酒共提携水牛礪角嫌畊少野繭抽絲喜價低

春雨行田無從吏獨騎齋馬畏青泥

送宋顯夫南歸

馬祖常

琵琶溝北識君初藉甚才華二十餘欲賦兔園干孝邸
不因狗監進相如瀟湘路熟逢知己韋杜天低望故居
携幼歸來拜丘壟南游莫戀武昌魚

駕發

馬祖常

蒼龍對闕夾天閭秋駕凌晨出國門十萬貔貅騎驪褭
一雙日月繡旗旛講蒐獵較黃羊圍錫宴恩沾白獸尊

赫矣漢家人物盛馬卿有賦在文園

送袁德平歸越

王士熙

平湖如鏡靜秋波禹穴西風捲碧蘿狂客有船都載酒
道人無字不籠鵝床頭舊笏青雲近窻下殘編白雪多
燕市塵深拂衣去海門何處問漁蓑

送王在中代祀秦蜀山川

王士熙

太華雲連蜀棧低柳花三月紫騮嘶香浮曉露金匱濕
播拂春烟絳節齊策牘當年登桂苑詞林後夜趣芝泥

長安遊客應無數誰共王褒頌碧雞

題郭忠恕九成宮圖

王士熙

鐵馬歸來定太平九成宮殿暑風清
龍蟠古洞長藏雨鳳入層臺自度笙
畫棟塵空巢燕去蒼崖雲掩路碑橫
秦川忽向丹青見魂夢依稀識化城

驪山宮圖

王士熙

翠嶺含烟曉仗催五家車騎入朝來
千峯雲散歌樓合十月霜晴浴殿開
烽火空臺留草樹荔支長路認塵埃

月中人去青山在始信昆明有劫灰

題鮮于伯幾與仇廉訪帖

王士熙

三生文采趙公子四海聲名仇使君彈琴不作廣陵散

焚香遙駐博山雲玉署春來鶯漫語繡衣人去鴈空聞

龍蛇兩紙光如玉即是安西與右軍

其帖之語曰趙公子明日欲過寒舍

看書畫廉訪相公能一來焚香彈琴亦佳趙公子子昂也後亦有跋帖廉訪字彥中今其子公哲御史寶藏此帖

寄上都分省僚友

王士熙

天上風清暑盡消，尚方仙隊按雲韶。
白鵝海水生鷹獵，紅藥山岡詐馬朝。
涼入賜衣飄細葛，醉題歌扇濕輕綃。
河堤楊柳休傷別，八月星槎到鵲橋。

畫省薰風松樹陰，合歡花下日沈沈。
腐儒無補漫獨坐，故人不到勞寸心。
紫極三台光景接，洪鈞萬象歲年深。
灤江回首九天上，誰傍香爐聽舜琴。

題節婦

王士熙

寒窗機杼泣秋風，鏡影鉛雲不汝同。
明月有光生夜白，

貞松無夢妬春紅
羅襦舊繡天吳拆
綠綺離弦海鶴空
陌上行人指華表
閉門疎雨落梧桐

上京次伯庸學士韻

王士熙

侍臣催講御階西
雲靜觚稜曉色低
天闕神州卑兩漢
地連碣石轉三齊
含香晝永閑青瑣
視草堂幽濕紫泥
最憶東山老松樹
秋風應有鶴來栖

大都雜詩

宋本

拋却漁竿滄海邊
拂衣來看九重天
畫闌九陌橋如月

綠影千門樹似烟南國佳人王幼玉中朝才子杜樊川
紫雲樓上如澠酒孤負春風二十年

繡錯繁華徧九衢上林辭賦漢西都朱門細婢金條脫
紫禁材官玉鹿盧萬里星辰開上界四朝冠蓋翊皇圖
東鄰白面生紈綺笑殺揚雄卧一區

盧溝曉月墮蒼烟十二門開日色鮮海上神山無弱水
人間平地有鈞天寶幢珠珞瞿曇寺豪竹哀絲瑇瑁筵
春雨如膏三萬里盡將嵩呼祝堯年

形勢全燕擁地靈梯航萬國走王城狗屠已仕明天子
牛相寧知別太平玄武鉤陳騰王氣白麟赤鴈入新聲
近來朝報多如雨不見河南召賈生

姑蘇臺

劉致

麋鹿應知易代頻吳趨誰唱不堪聞捧心臺暗梨花月
抉目門深薜荔雲江閬水犀歐冶劍氣騰金虎闔廬墳
計然已死鴟夷逝寂寞五湖西日曛

綿竹縣治

楊靜

通衢砌石蘚生鱗
三兩人家屋宇新
嚴子有祠存故里
魏公無第與比鄰
傳訛共說千年樹
問話那逢百歲人
回首向來佳麗地
暮雲斜日紫巖春

燕中懷古

李源道

荆卿墓上草離離
郭隗臺邊對落暉
戰國山川秋氣壯
中原豪傑曉星稀
乾坤納納無人識
南北年年有鴈飛
說似盧溝橋畔柳
安排青眼送將歸

宗陽宮翫月

楊載

老君臺上涼如水坐看冰輪轉二更大地山河微有影
九天風露寂無聲蛟龍並起承金榜鸞鳳雙飛載玉笙
不信弱流三萬里此身今夕到蓬瀛

擬去京師

楊載

囊衣囊載道傍車人事匆匆歲欲徂風雨五更雞亂叫
江湖千里鴈相呼蕪菁散漫根猶美桑柘蕭條葉正枯
却上高丘重回首五雲繚繞帝王都

貢袁諸公修史

楊載

詔編國史有程期正是諸郎倬直時虎士守門宮窈窕
雞人傳箭漏遲遲窻間夜雨銷銀燭城上春雲壓綵旗
才大各稱天下士書成當繼古人為

宿李陵臺

周應極

曠野平蕪入壯懷征鞍小駐李陵臺關河萬里秋風晚
霜月一天鴻鴈來持節蘇卿真壯士開邊漢武亦奇才
千年懷古無窮意且向郵亭酌酒盃

睢陽懷古

李鳳

睢陽城郭劫灰餘風景蕭條市井疎堤接汴梁分驛路
地連齊魯幾兵車張巡戰壘沙沈戟關伯提封草滿墟
珍重開元遺寺在石幢猶刻魯公書

周氏慈雲庵

揭傒斯

韓阿松栢野烟飛丞相文章入鳳池華屋青山春掩冉
浮雲流水暮逶迤哺烏時拂巖花落馴鹿長環宰樹悲
唯有慈孫禁垣裏年年南望不勝思

元文類卷七

欽定四庫全書

集部

元文類卷八

詳校官通政使_臣夢吉

助教_臣常循覆勘

總校官庶吉士_臣朱鈐

校對官中書_臣嵇承志

謄錄監生_臣劉大耀

欽定四庫全書

元文類卷八

元 蘇天爵 編

五言絕句

錄汴梁宮人語

楊 真

一入深宮裏經今十五年長因批帖子呼到御床前

其二

歲歲逢元夜金蛾鬧簇巾見人心自怯終是女兒身

其三

殿前輪直罷偷去賭金釵怕見黃昏月殷勤上玉階

其四

翠翹珠掘背小殿夜藏鈎薦地羊車至低頭笑不休

其五

內府頒金帛教酬賀節盤兩宮新有旨先與問孤寒

其六

人間多粟粟不到九重天長被黃衫吏花攤月賜錢

其七

仁聖生辰節君王進玉卮壽棚兼壽表留待北還時

其八

邊奏行臺急東華夜啓封內人催步輦不候景陽鐘

其九

畫燭雙雙引珠簾一一開輦前齊下拜歡飲辟寒盃

其十

聖躬春閣內只道下朝遲扶仗嬌無力紅綃貼玉肌

其十一

今日天顏喜東朝內宴開外邊農事動詔遣教坊回

其十二

駕前雙白鶴日日候朝回自送鑾輿去經年更不來

其十三

陡覺文書靜相將立夕陽傷心寧福位無復夜薰香

其十四

二后睢陽去潛身泣到明却回誰敢問校事有心情

其十五

為道圍城久粧奩關犒軍入春渾斷絕飢苦不堪聞

其十六

監國推梁邸初頭靜不知但疑牆外笑人有看宮時

其十七

別殿弓刀響倉黃接鄭王尚愁宮正怒含淚強添妝

其十八

一向傳宣喚誰知不復還來時舊針線記得在窻間

其十九

北去遷沙漠誠心畏從行不如當日死頭白若為生

酬昭君怨

楊奐

玉貌辭金闕貂裘擁繡鞍將軍休出戰塞上雪偏寒

春日

游絲困無力欲起重悠揚芳草落花滿相思春晝長

石鼎聯句圖

劉因

玩世如一鼎姓名誰得聞仙翁應自笑知我有鄒訢

螻蛄

劉因

後利前還澁陰陽體段分不須觀兔尾即此見義文

薔薇

劉因

色染女真黃露凝天水碧花間日月長朝暮閱兩國

采薇圖

盧摯

服藥求長年孰與孤竹子一食西山薇萬古猶不死

題張尹書巢

吳澂

食息不離書令尹非蠹魚騰身出巢外編簡不如吾

又

醯雞瓮裏天露蟬殼外身此巢何處着六合一微塵

題江州庾樓

賀復孫

宿鳥歸天盡浮雲薄暮開淮山青數點不肯過江來

錢選宮人圖

安熙

露冷月華白悠悠方寸心夫君渺何許悵望碧雲深

市莊

王結

市莊主人踏門徵詩短歌六章用塞雅命其卒章之亂
聊示莞爾之謔云躬畊之暇擊壤緩歌抱膝微吟亦足

以超然於天壤間也

其一

烏府振弘規鳳閣司婉畫退食休別墅逍遙古樂國

其二

沃若成都桑欄斑青門瓜隱顯亮殊途高致惟一家

其三

晨鐘趨朝班日旰遊市莊兩兒帶經鋤奕世流芬芳

其四

若人孔氏徒臺閣揚清風休日植杖耘高揖荷蓀翁

其五

城居匪湫隘桑果連畛畦吾廬有高興何必空山棲

其六

老我縛塵纓山林渺遐思羨君市有莊取魚兼熊掌

節婦黃氏

馬祖常

白日松臺閔青山石椁沈十年哭夫淚下入九泉深

過李陵臺

馬祖常

蹕林聞野祭漢室議門誅辛苦樓蘭將淒涼太史書

七言絕句

讀汝南遺事

楊 奐

軹道牽羊事已非更堪行酒着青衣
裹頭婢子那知此爭逐君王烈焰歸

六朝江水故依然隔斷中原又百年
長笑桓溫無遠畧竟留王猛佐苻堅

明皇擊梧圖

李俊民

不使黎園弟子知
太平音在鳳凰枝
一朝野鹿銜花去
長恨秋風葉落時

過陳司諫墓

劉祁

鸞坡烏府舊遊空
三尺孤墳野寺中
猶有憂時心不死
墓門昨夜起秋風

瀟湘夜雨

李冶

遠寺孤舟墮渺茫
雨聲一夜滿瀟湘
黃陵渡口風波暗
多少征人說故鄉

墨海棠

李冶

漢宮愁絕冷裊赦一醺劉郎兩鬢絲甲帳夜寒銀燭短
六銖雲帔獨來時

征南口號

杜瑛

春早雲南麥已黃瀘江蒸霧水如湯馬蹄半帶陰山雪
變作人天六月涼

春日雜詠

圖克坦公履

東風簾幕半塵埃歌舞臺空畫不開試問雙飛新燕子

今年社日為誰來

登北邙山

楊果

干戈叢裏過壬辰原上纍纍冢墓新
寒食清明幾家哭
問來都是陣亡人

魏家池館姚家宅佳卉而今採作薪水北水南二三月
舊時多少看花人

村居

楊果

草堂有燕賀新成沙渚無鷗續舊盟
滿徑落紅風掃靜

一渠春碧雨添平

春波淡淡捲寒漪
長日蕭蕭靜竹扉
村舍蠶催桑葉大
山田鹿食麥苗稀

峴山秋晚圖

楊果

江水江花遠大堤
太平歌舞習家池
而今風景那堪畫
落日空城鳥雀悲

太真教鸚鵡圖

馮謂

溫泉賜浴意融怡
猶念寧王玉笛吹
却怕能言泄幽事

丁寧慎勿語人知

覃懷春日

趙復

江南江北半浮生蹤跡居然水上萍
竹雞啼罷山雨黑蠶子生時桑柘青

春晴

劉辰翁

江柳長天草色齊新晴何物不芳菲
無因化作千蝴蝶西蜀東吳款款歸

新燕池塘綠雨肥初晴未暖日光微
角巾猶帶花梢濕

纔倚闌干見絮飛

春浦帆歸圖

孟攀麟

涵空水色碧於苔
照眼山光翠作堆
疑是桃花源上客
輕舟天外得春來

杭州聞角

梁棟

聽徹哀吟獨倚樓
碧天無際思悠悠
誰知盡是中原恨
吹到江南第一州

有懷

劉秉忠

雨過幽庭長綠苔東風時為掃塵埃無人曾見春來處
門外桃花只自開

風雨圖

許衡

南山已見霧昏昏便合潛身不出門直到半途風雨橫
倉惶何處覓前村

風雨迴舟

張孔孫

風雨來時撥棹迴濟川心事有誰知停舟且做江湖夢
浪靜風恬未是遲

水仙花

商挺

海上三山壁月明
人間誰識許飛瓊
秋風吹上青鸞背
來散天香與素英

明月珠衣翡翠裳
冰肌玉骨自清涼
不隨王母瑤池去
來侍維摩病几傍

書事

劉因

當年一線魏瓠穿
直到橫流破國年
草滿金陵誰種下
天津橋畔聽啼鵑

卧榻而今又屬誰江南回首見旌旗路人遙指降王道
好似周家七歲兒

朱張遺學有經綸不是清談誤世人白首歸來會同館
儒冠爭看宋師臣

風節南朝苦不伸汴流直要到崑崙世宗一死千年欠
此是黃河最上源

唱徹芙蓉花正開新聲又聽采茶哀秋風葉落踏歌起
已覺江南席卷來

山寺早起

劉因

松窗一夜遠潮生
斷送幽人睡失明
夢覺不知春已去
半簾紅雨落無聲

讀史評

劉因

紀錄紛紛已失真
語言輕重在詞臣
若將字字論心術
恐有無邊受屈人

山行

劉因

西崦人間竹映溪
山深雨暗到來遲
行窮谷口水才見

金匱要略卷八
流盡巖花春不知

卷八

山家

劉因

馬蹄踏水亂明霞
醉袖迎風受落花
怪見溪童出門望
鵲聲先我到山家

寫真詩卷

劉因

龍祠嶽廟盡冠巾
雨露何關土木身
不是一程窮物理
誰從一髮辨天真

己巳春往均州

宋衡

武當却立翠屏新
碧玉溶溶漢水奔
如畫江山千古在
城闉幾度戰塵昏

觀出獵

宋 衛

金鉞染血犬銜毛
倒臂蒼鷹掣錦絛
紅日下山秋塞濶
齊歌野樂陣雲高

平原馬首鴈行齊
狡兔深藏鳥不飛
環立傳觴人半醉
斜欹貂帽雪中歸

壽陽梅粧圖

錢選畫

王思廉

金史四庫全書
卷八
一聲白鴈渡江潮，便覺金陵王氣銷。
畫史不知亡國恨，猶將鉛粉記前朝。

昭君出塞圖

王思廉

黃沙堆雪暗龍庭，馬上琵琶掩淚聽。
漢室禦戎無上策，錯教紅粉怨丹青。

汾亭古意圖

張礎

漢家宮闕白雲秋，魏國川原過鴈愁。
萬古松風一茅舍，不隨華屋變山丘。

關山風雨圖

張礎

山氣凝寒雨不開
江濤拍岸雪成堆
漁翁慣識風波惡
天際孤舟已早迴

絕句四首

趙孟頫

春寒惻惻掩重門
金鴨香殘火向溫
燕子不來花又落
一庭風雨自黃昏

湘簾細織浪紋稀
白苧新裁暑氣微
庭院日長賓客退
滿池芳草燕交飛

搖落山川草樹稀
白雲時逐鴈南飛
苦無綠酒酬佳日
猶有黃花媚夕暉

梅花半落雪飄零
楊柳青青江水生
一夜東風吹鴈過
江南江北總多情

錢選畫花

陳嚴

雪翁夙號老詞客
亂後却工花寫生
寓意豈求顏色似
錢唐風物記昇平

題道院

高克恭

綠陰無際壓蒼苔為愛幽深手自栽
風月早知煩耳目
不教春筍過牆來

草色琅玕遍雨楹
蚤陰才過午陰清
斜陽又送西軒影
一就移床待月生

無錫山中留題

高克恭

山深自昔無車馬道在何曾畏虎狼
祇恐閑人來看竹
淋漓醉墨污新牆

即事

高克恭

古木陰中生白烟忽從石上見流泉閑隨屈曲尋源去
直到人家竹塢邊

過弋陽

高克恭

雷聲驅雨過山西山腹雲根似削齊日暮牧兒歸不得
料應白水漲前溪

過信州

高克恭

二千里地佳山水無數海棠官道傍風送落紅攬馬過
春光更比路人忙

過京口

高克恭

北來朋友不如鴻幾個西飛幾個東多少登臨舊臺觀
闌干閒在夕陽中

寄王總管

李昶

華陽東下古梁州五馬旌旗擁上游腸斷寒江衣帶水
令人空望鎮南樓

過故縣埧

李昶

憲宗皇帝射臺高氣壓蠻江萬丈濤玉輦不歸巖樹冷

白雲何處醉蟠桃

杏花始開小酌

安熙

生紅和露滴胭脂又到芳春寂寞時便擬提壺花下醉
却愁羞殺背陰枝

杖藜吟遶去還來收拾春光入酒盃自是風花要題品
等閑蜂蝶莫相猜

和郭安道治書韻

周馳

西風吹起白頭波半夜扁舟掠岸過不向長橋酤一醉

滿天明月奈秋何

君醉淋漓我浩歌
古人為恨復如何
秋來幾日渾無賴
已有新霜著芰荷

江間小艇數能乘
活計如今船子僧
近喜老妻能斫膾
欲令稚子學扳罾

久客思歸歸未能
題書附與遠遊僧
吳松江上鱸魚美
何處人家不下罾

遼陽高節婦

王結

天東長白近蓬瀛縹緲仙人玉雪清鳳去紫簫聲已絕
青鸞獨跨上瑤京

秋懷

曹元用

沙磧秋高宛馬肥哀笳一曲塞雲飛南都兒輩應相念
過盡征鴻猶未歸

贈李祕監

至治間曾
畫御容

張養浩

封章曾拜殿庭間凜凜丰儀肅九關回首橋山淚成血
逢君不忍問龍顏

青山白雲圖

虞集

獨向山中訪隱君
行窮千澗水
沄沄仙家更在空青外
只許人間禮白雲

水芙蓉

虞集

長州宮沼醉西施
蕩漾蘭舟不自持
願奉君王千歲樂
一盤清露玉淋漓

木芙蓉

虞集

九月襄王燕渚宮
霓旌翠羽度雲中
滿汀山雨衣裳濕

宋玉愁多賦未工

春雲

虞集

春雲冉冉度宮城樓雪初融水半生行過御溝人久立
舉頭枝上有啼鶯

雨裏輕塵道半乾朝迴隨處借花看牆東半樹垂楊柳
飛絮時來近馬鞍

聽雨

虞集

屏風圍暖鬢參參絳蠟搖光照暮酣京國多年情盡改

忽聽春雨憶江南

何處它年寄此生
山中江上總關情
無端繞屋長松樹
盡把風聲作雨聲

庚午廷試次韻

虞集

待漏宮門聽鑰開
袖中進卷總賢才
奏名殿裏千花合
傳勅階前好雨來

千花覆檻柳垂絲
晝刻傳呼淑景移
聖主自觀新進策
侍臣簪筆立多時

曹將軍馬

虞集

高秋風起玉關西
踣鐵歸朝十萬蹄
貌得當時第一疋
昭陵風雨夜聞嘶

寄家書

馬祖常

春雲閣雨花泥少
池上波平飛白鳥
薊中河外盡天涯
蓮葉圓時身到家

題柳道傳詩卷

馬祖常

九曲珠穿蟻度絲
雙環鏡透月輪虧
人間自有鸛鷺侶

早奏簫韶見鳳儀

宮詞

馬祖常

華清水殿繡芙蓉金鴨香銷寶帳重
竹葉羊車來別院
何人空聽景陽鐘

銀床井冷露漙漙半臂薰衣釧辟寒
不恨長門冬夜永
小奴休報鞦羅單

長門月轉漏聲催自熨寒衣減帶圍
休怕官家嫌體弱
細腰曾是楚王妃

合宮舟泛濯龍池端午爭懸百綵絲新賜承恩脂粉磴
上陽不敢妬蛾眉

繭館綠絲濕翠翹夫人纖指織龍綃羅襦雙珮清晨響
只恐君王有晏朝

八姨粉翠錫千緡脂盥新粧百寶勻白髮上陽宮女老
補衣重拆繡麒麟

卯酒微微解宿醒催花羯鼓報新聲君王好錫承恩宴
辛苦邊頭百將營

露蘭研粉壽陽粧
奩內新燒百刻香
圓舌教成鸚鵡語
偷將玉笛送寧王

銀河七夕渡雙星
桐樹逢秋葉未零
萬歲君王當寧坐
妾身不願命如萍

花氣蒸霞淑景明
望仙樓上看彈鶯
李暮吹笛宮牆外
學得梨園第一聲

孟光舉案圖

王執謙

白髮梁鴻與世乖
賴逢光也配其才
五噫歌罷愁無奈

不覺春從案上來

題甄氏訪山亭

陳觀

水流花落石生雲日靜風喧草欲薰老去風流猶未減
一丘一壑要平分

雨後西山翡翠堆結亭直欲近巖隈從今記取溪頭路
一日須來一百迴

清明日遊太傅林亭

辛文房

隔水園林丞相宅路人猶記種花時可憐總被風吹盡

不許遊人折一枝

玉簪


張淳

開軒俯瞰碧雲衢
白筆含香半吐鬚
帶露折來何處可
膽瓶秋水澹如無

過郝參政墓林

鮑仲華

茂林喬梓上千雲
葉葉曾沾雨露恩
萬古西山青不斷
鳥啼花落幾黃昏



元文類卷八